

All hülf/ vnd rott hat vns verlon.
Wir werden jnn die harr vndergon
Der wynd verfür vns mit gewalt
Eyn wis man / sich do heym behalt
Vnd nãm by vns eyn wislich ler
Wog sich nit lichtlich vff das mer
Er kunn dann mit den wynden stritten
Alls Vlisses det / zũ synen zytten
Vnd ob das schiff gang vnder joch
Das er zũ land kunn schwymmen doch
Dar vmb erdryncken narren vil /
Zũm stad der wisshet yeder yl
Vnd nãm den ruder jnn die hend
So mit er wiss / wo er hyn lend
Wer wis ist / kumbt zũ land mit fũg
Es sint doch on das narren gnũg
Der ist der best / der selber wol
Weiß / was man dũn vnd lossen sol
Vnd den man nit darff vnder wisen
Sunder die wisshet selb dũt pryfen
Der ist ouch gũt / wer andere hört
Vnd von jnn zũcht / vnd wisshet lert
Wer aber der keyns über al
Kan / der ist jnn der narren zal
Ob der diß schiffs sich hat versumbt
So wart er biß eyn anders kumbt
Er würt gseltschafft synden geryng
Mit den er Gaudeamus sing
Oder das lied jm narren don
Wir hant vil brüder dussen gelon
Das schiff ouch würt zũ boden gon

